



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym tiryimym@aolima tir yimym TAPAK 7

**Naveen Patnaik-i Odisha Chief Minister menden nungji anener**

**Ukraine nung France nungger military trainer tem dak tenük yoktsü: Lavrov**



VOL. XXI ISSUE NO. 234 (ADOK 234) DIMAPUR YANGTEPNÜ (THURSDAY) AAMI (JUNE) 06, 2024 ₹ 5.00

## CNWA o Watsü Mungdang telungjem mensem aka NDA-i kümsük tasembenbuba atema Narendra Modi shimtetogo



**Mokokchung, 5th June (TYO):** Central Nagaland Women Association (CNWA) aser Watsü Mungdang na 5th June, 2024 nü Watsü Mungdang office nung mensem ka amen ta osang ka ajanga metetdaksü.

Iba mensem nung CNWA President, K. Atoli Semai kin asem sanger tetsürtem tali tashi itshia maparen ajak nung amalitepa aser nungiteptsü ajungshia liasü.

33% reservation dak sentakba nung CNWA President den züngsem ana July ita 2023 küm Delhi nung Supreme court nung keno angadanga (hearing) mapang or aden aser reservation atema jembiba lai lemsatop.

Nagaland nung ward ajak senteper 418 nung ULB election

26th June, 2024 nü akatsüba lir aser 142 ward nung tetsür kisung tokteptsü. Mokokchung district nung tetsür atema 16 wards lir, iba nung Aotsür takutet tajung aika shilem agidaksütsü ajungshitsü aser Watsü Mungdang-i reservation aliba tesemtem nung election tiptema timi (free and fair election) agitsü ajungshiba den common platform ayongzüka katsüba atema laisa pelaba metetdaksü.

Ano iba mensem nung asen lima koba delimitation agitsüba lir, iba ya ishüba akümtsüba masü saka teimba ang meshisemtsüba atema teloki lemsatopa liasü. Iba dak alaka ano tongtumbang onük balala nung shisa lemsatopa liasü ta ta kasa osang ajangasa metetdaksü.

## Treasuries & Accounts nung Pensioners' Helpline tenzükogo

**Dimapur, Aami/June 05 (TYO):** Nagaland nung pensioner temi timtem balala ajangshiba nung yariteptsü nükjidong nung Pensioners' Helpline ka tenzükogo, ta Directorate of Treasuries & Accounts-i sangdong ka nung ashi.

Iba Helpline ya Accountant General Office ajanga pension maparen renemtsüba sülen metokmeperi adokba nung pensioner tem yaritsü atema teyari agütsüba sapang ka amai lir.

Pensioner tem nungdak balala ajiteta iba helpline yagi

department ketdangsürtem den telephone ajanga jembitetsü. Department ajanga par website nung online grievance registration facility agüja lir, saka internet malir mesüra online service mamshiteter atema tekeraba nung teyari agütsütsü mechi iba helpline ya amenok.

Pensioner temi office mapang ketdangsürtem den 87987 47825 aser 87987 47826 ajanga jembitetsü. Ano WhatsApp nunga 87987 47800 ajanga tongteprateptsü akok, ta department ajanga sangdong nung ashi.

## JCF Dimapur-i 'Clock Tower' nungja jangjashitsür

**Dimapur, June 5, 2024 (TYO):** Dimapur nung 'City Tower' ta ajaba ya tesem mesüra kiyong masü saka HDFC aser Bandhan Bank lapoka aliba ki nungja lir.

Tesüiba nunga teintet rogotem aser council kari 'City Tower' nungja tim mesüi amshiba atema jangjashitsüogo saka public aser Dimapur Municipal Council-ia iba nungja aibelener amshir ta Joint Council Forum (JCF), Dimapur-i sangdong ka nung ashi.

Colony asem indang lenjem nung yin agi yanglua aliba ya tesüiba ketdangsürtem aser lennirtemi Clock Tower ta jaloktsü. Iba ya City Tower masü anungji meratatsü atema Clock Tower ta amshitsüla ta JCF-i ashi.

Maneni, Dimapur Municipal Council-i iba tower nung clocks yanglushitsü atema senotsü agütsü junger ta JCF-isa tebilemba ka shidangogo.

**New Delhi, June 5, 2024 (Agencies):** National Democratic Alliance (NDA) lennirtemi June 5, 2024 nü New Delhi nung parnok lennir asütsü atema Narendra Modi shimogo.

2024 Lok Sabha elections nung Modi lenisüba kübok NDA-i menden teimtiba nung takok anguba sülen tanü NDA lennirtemi iba lemtet agiogo.

Bodbarnü Prime Minister' er kidang senden amendang BJP President J.P. Nadda, Home Minister Amit Shah, Defence Minister Rajnath Singh aser BJP den yaritepba teloktem nungi lennirtem adenshia liasü.

NDA nung adenertem TDP tanishir Chandrababu Naidu, JDU tanishir Nitish Kumar aser SHS tanishir Eknath Shinde nungger iba senden nung aden.

Modi'er sorkari sensakertem, tetsürtem, lanurtem, aluyimertem aser ajembanga aliba sensotem dena India nung tangar memenebpa nisungtem bendanga tenzükba atema senden nung adenertemi tenüngsang agütsü.

Sorkari maneni linük nung sensotem libaliro jenjang tajungba kümdaksütsü merangtsü aser kasa mapang India senmang wazüka ayutsü aser terenlok bener arutsü ta tanü NDA senden nung bangjemshia liasü.

Tanep PM Modi-i President Droupadi Murmu den ajurutepa menden nung anentsü shidi agütsü saka President Murmu-i sorkar tasen ka maküm tashi ketdangsüa atatsü mapa lemezütsü.

Tanep PM Modi-isa tatembangba Union cabinet

senden ayonga amen. "Takok aser tamakok anguba ya politics nung shilem ka lir. Asenoki

tesüiba küm 10 nung mapa tajung inyakogo aser maneni inyaktsü" ta pai senden nung ashi.

Party	Takok Anguba
Bharatiya Janata Party - BJP	240
Indian National Congress - INC	99
Samajwadi Party - SP	37
All India Trinamool Congress - AITC	29
Dravida Munnetra Kazhagam - DMK	22
Telugu Desam Party- TDP	16
Janata Dal (United) - JD(U)	12
Shiv Sena (Uddhav Balasaheb Thackrey) - SHSUBT	9
Nationalist Congress Party - Sharadchandra Pawar	8
Shiv Sena - SHS	7
Lok Janshakti Party(Ram Vilas) - LJPRV	5
Yuvajana Sramika Rythu Congress Party - YSRCP	4
Rashtriya Janata Dal - RJD	4
Communist Party of India (Marxist) - CPI(M)	4
Indian Union Muslim League - IUML	3
Aam Aadmi Party - AAP	3
Jharkhand Mukti Morcha - JMM	3
Janasena Party - JnP	2
Communist Party of India (Marxist-Leninist) (Liberation) - CPI(ML)(L)	2
Janata Dal (Secular) - JD(S)	2
Viduthalai Chiruthaigal Katchi - VCK	2
Communist Party of India - CPI	2
Rashtriya Lok Dal - RLD	2
Jammu & Kashmir National Conference - JKN	2
United People's Party, Liberal - UPPL	1
Asom Gana Parishad - AGP	1
Hindustani Awam Morcha (Secular) - HAMS	1
Kerala Congress - KEC	1
Revolutionary Socialist Party - RSP	1
Nationalist Congress Party - NCP	1
Voice of the People Party - VOTPP	1
Zoram People's Movement - ZPM	1
Shiromani Akali Dal - SAD	1
Rashtriya Loktantrik Party - RLTP	1
Bharat Adivasi Party - BHRTADVSIP	1
Sikkim Krantikari Morcha - SKM	1
Marumalarchi Dravida Munnetra Kazhagam - MDMK	1
Aazad Samaj Party (Kanshi Ram) - ASPKR	1
Apna Dal (Soneylal) - ADAL	1
AJSU Party - AJSUP	1
All India Majlis-E-Ittehadul Muslimeen - AIMIM	1
Independent - IND	7
<b>Total</b>	<b>543</b>

## Higher Education Directorate nung World Environment Day among

**Kohima, June 5, 2024 (TYO):** Directorate of Higher Education, Nagaland-i Bodbarnü World Environment Day tenü nung sentong ka ayongzüka agiogo.

Parnoki "Grow trees for greener and healthier environment" omen nung ajemdaker Kohima nung office kima nung süngjanglijangdong kar atem.

Iba sentong atema Higher education & tourism minister Temjen Imna Along-i süngjangdong tapu balala indang sapling 150 agütsü.

Higher & Technical Education Additional Secretary Sentiyanger Pongen-i o tatsüka jembidang süngdonglidong aser shiruru kümzüka ayutsü ayongzü.

Maneni, Higher education

director Dr. A. Nshoga-ia lipoküm tayongzüka balala indang lemsatop aser teküpoktuba jenjang nungi mapa inyaktsü ayongzü.

Iba mapa ya Joint Director Menuokholie Kire, Deputy Director Medongoi Rhakho, OSD Lisepe Sangtam, Liaison officer Neitsho Wezah aser Registrar Watisangla nungger adenba luden ka ajanga inyak.

## Northeast nungi BJP-i menden 13 aser Congress-i 7 angu

**Guwahati, June 5, 2024 (Agencies):** Northeast nung Lok Sabha menden ajak agi 25 lir aser taküm elections nung Bharatiya Janata Party (BJP)-i menden 13 aser Indian National Congress (INC)-i menden 7 nung takok nguogo..

Congress-i Manipur nung menden 2 aser Nagaland o Meghalaya nung menden kaka den Assam nung menden 3 nung takok angu.

2019 Lok Sabha election nung ama BJP-i Assam nung menden 9 aser Tripura o Arunachal Pradesh nung menden anana nung takok angu. BJP-i Tripura, Arunachal Pradesh aser Manipur nung state sorkartem yimsü asür.

BJP den yariteper National People's Party (NPP)-i Meghalaya nung menden anaprong nung tamakok nguogo. Meghalaya nung Congress aser Voice of the People Party ajanga

menden kaka nung takok angu. Külen, Nagaland nunga BJP den yariteper Nationalist Democratic Progressive Party (NDPP)-i Congress tsüngdang tamakok angu.

Ajisüaka, Assam nung BJP den yariteper United People's Party Liberal (UPPL) aser Asom Gana Parishad (AGP) den Sikkim nung Sikkim Krantikari Morcha (SKM) ajanga menden kaka nung takok nguogo.



## Asetkong Rongsenketsüng Shisatokden Sentong aka



Wb. T.N. Mannen, IAS (Retd.)

**Mokokchung, June/Aami 05 (TYO):** Asetkong Senden Salang, Kubolong nung tanu Asetkong Rongsenketsüng Shisatokden Sentong tajung ka Think Tank Committee ajanga ayongzüka kaogo.

Asetkong ya ali tajung aliba lima ka lir aser iba temoatsüji agia Asetkong nüburtemi züsenteta agitsü aser ano mapa balala inyaka tajangzük agitetsüsa inyaktetsü lenmang bushiteta nübur anitsü Think Tank Committee ya tetetba lir ta Think Tank Committee Convenor Wb. T. Imlitoshi-i sentong ayongzüka nungtem o jembidang ashi.

Iba Think Tank Committee ya Hon'ble Advisor, Law & Justice, Land Revenue. Govt. of Nagaland Wb. T. N. Mannen, IAS (Retd.)

ajanga shisa agüja tenzüksü, aji asünung Asetkong asoshi iba Think Tank Committee inyakba mapatem ajak nung Asetkong yimsüsür, kija aser telok ajaki yaritepdaktsünerta Think Tank Committee Convenor-isa adenshia alir Asetkong nungertem ayongzük.

Tanu iba sentong nung Tongti o raloktsür Hon'ble Advisor, Law & Justice, Land Revenue. Govt. of Nagaland Wb. T. N. Mannen, IAS (Retd.)-i jembidang yimden yimsüsüba aser nübur libaliro inyaksangshi melenshiba aser rongsenketsüng nung renlokba ajanga terenlok bener arutsütsü, anungji sobaliba, libaliro, inyaksangshi aser rongsenketsüng nung Asetkong nüburtem peria litettsü aser nüburtem den lemsateptsüsa litettsüla ta ashi.

Paisa Asetkong limaji ali temo aliba lima, anungji tanu tekong lu mayimer saka tsünüsempongtsü balala agitsü aser achitsü aser peria agir kelenya yoktetsü aser tajangzük agitetsüsa inyaksü kanga dang tongtipangta ashi.

Wb. T. N. Mannen-isa Asetkong nungeri dang züsentetra aser inyaktetra Assam state dena shishilembatsü asoshi lenmang

tajung sademsadema sentaktepa lir, tanu Nagaland nung zünger mapa mangur 70000 lir, tanu tensa item lanur ajak jagibo sorkar mapa melarabo mangutsü, anungji lanurtemi aser nüburtemi ali dangi meyipa yang nungjagi züsenteter tajangzük agiteta takum anisüngzüka litettsüta lemsatep.

Kasa shisatokden sentong nung Shisalen Sayur Wb. Meyasahi Longkumer, Director of Horticulture, Er. T. Imlisunep Ao Principal, Industrial Training Institute, Mkg aser Dr. Sarendi Walling Asst. Chief Technical Officer (Animal Science) Krishi Vigyan Kendra, Mkg par asemi onük balala nungi shisatsü agütsü aser Asetkong Mungdang Tir Wb. S. Panyang Ozüküm ajanga tajungshi o jembi aser sentong tenzüka Kubolong Baptist Arogo Pastor ajanga sarasademer tenzü, Kr. Orina Aier ajanga ken tajung ka tena sentong lemladaktsüba den Wb. Aongsen Aier ketdangsuba nung iba sentong agia liasü.

Tanu iba sentong nung Asetkong yimtsüng ajak nungi putu yimsüsürtem den nübu tabensa aruagi dena liasü.

## MOVCD-NER 2023-24 kübok organic farming training agütsü

**Kohima, Aami/June 05 (TYO):** Mission Organic Value Chain Development for North Eastern Region (MOVCD-NER) 2023-24 kübok Organic Farming indang training sentong tawa SDAO Chiephobozou, Kohima District kübok Agriculture Department ajanga Tuophe Phezou, Tuophema, Botsa aser Chiechama yimtsüngtem nung ayongzüka liasü.

Tuophe Phezou, Tuophema aser Botsa yimdaklir dang mozü mamshi coffee lu ayimtsü indang sayu aser Chiechama yimtsüng nung alirtem dang Job's tear aser foxtail millet lu ayimtsü indang sayua liasü.

Chiechama yimdak iba sentong ya May 24 nü iba sentong agidang Mhasikhotuo Mere, SDAO, Chiephobozou menden liasü aser paisa aluyimer dang mozü mamshi alu ayimba yimya amshitsü ajungshia liasü.

Pai aluyimer dang tzü-mopung mashishiba Job's tear aser foxtail millet amala züsentetsü ajungshia aser item ya Nagaland

nunga junga yokteter ta ashi.

Iba sentong nung Chiechama Village Council tenüng nung Pukuolie Chadi, GB aser Neichulie Rüpreo, Coordinator MOVCD-NER Chiechama Village nungeria jembia liasü.

Iba sentong nung tetushi tesemdanger, Aleympang Longchar, Additional Deputy Commissioner, Chiephobozou ajanga state nung aluyimba tsütsü temulung tali agütsütsü ayongzük, kechiaser state nung ali temu peria lir aser itemji asen ajangzüktsü atema akok tashi amshitsüla, ta ashi.

Pai yimdaklir dang iba training nung temulung agüja adentsü ayongzük aser Agriculture Department-i yimdak-yimtsüng tashinung arua aluyimba tsütsü tesayuba balala agütsüba atema pelaba lemsatepa liasü.

Iba sentong sülen yimdakirtem atema training session ka ayongzüka Neisakuo N Angami, AO, SDAO Chiephobozou ajanga Nagaland nung Organic Farming indang yimya balala sayua liasü.

## HSLC aser HSSLC (Compartmental & Improvement) Exam 2024 atema metetdaksür

**Dimapur, Aami/June 05 (TYO):** Nagaland Board of School Education (NBSE) ajanga June 11, 2024 nungi June 21, 2024 tashi HSLC Compartmental & Improvement Examinations 2024 aser HSSLC Compartmental & Improvement Examinations 2024 agitsü.

National Education Policy (NEP) 2020 nung National Credit Framework (NCrF) atema education stage balala nung Credit Transfer Policy atema shia lir.

Anungji iba tangatetba nung kaketshir tamakok ngua aliba subject tem nung takok angutsü aser kaketshirtem pei azüingba nung tajungba akumtsü mechi 2024 examination nungi tenzüka HSLC aser HSSLC Compartmental Examination & Improvement of Performance atema eligibility criteria ya subject 3 (asem) aliba nungi 4 (pezü) kumtsüogo.

HSLC aser HSSLC examinations 2024 nung subject pezü aser tajemba nung fail sür aliba kaketshir tem HSLC / HSSLC Compartmental Examination nung amentsü melar.

Temsüa aliba Compartmental candidates tem nem improvement nungdaka aliba/failed subjects nung takok angutsü atema maongka anaben agütsür.

HSLC aser HSSLC Examination 2024 nung qualified/pass sür ano marks tajungba aginer temi subject pezü mesüra tajemba nung Improvement Examination agütsütsü melar.

HSLC Examination nung qualified bo sür sürnung subject

ka nung Needs Improvement ngua alirtema courses balala nung apply sütettsü, recruitment criteria balala tongtetsü atema Needs Improvement subject nung tanaben tatidang agütsütsü maongka agütsür.

HSLC Compartmental Examination 2024 atema kaketshir 3006 tenüng zülüoka lir aser Improvement Examination atema kaketshir 81 tenüng zülüoka lir.

Tatidang ya Pungro sub-division densema district headquarters nung aliba centre 18 nung agitsü.

HSSLC nung Compartmental Examination atema kaketshir 1703 tenüng zülüoka lir aser Improvement of Performance atema kaketshir 77 tenüng zülüoka lir aser state nung examination centre 17 nung iba tatidang ya agütsütsü.

HSSLC nung stream balala nung Compartmental agütsütsü telemsa yamai - Arts - 1227, Commerce - 62 aser Science - 414, aser Improvement examination atema Arts nung 8 aser Science nung 69 alitsü.

Iba dak sendakba nung Board ajanga June 3, 2024 nü Centre Superintendents tem den online meeting ka mena tatidang ochishia aser yimya shidak nung agitsü jembia liasü.

Board indang portal nung statistics boullets tem upload süja lir, anungji HSLC aser HSSLC Compartmental & Improvement Examinations 2024 atema tenüng agüja aliba kaketshir temi pei indang examination centres ya www.nbsenl.edu.in nungi repranger pei examination centre tem nung Admit Cards bendentsü metetdaksür, ta NBSE sangdong ajanga ashi.

## LKM Office 'Plastic Free Campus' sangdongogo

**Mokokchung, Aami/June 05 (TYO):** Langpangkong Kaketshir Mungdang (LKM) indang office ya June 5, 2024 nü World Environment Day nung 'Plastic Free Campus' ta sarasadema sangtonga (Declare) liasü. Alima tzü-mopungji tarutsü lanur senmang aser item kümzüksüji kaketshir tebilemtsü aser teinyaktsü khuret ta angateta LKM office ajanga 2023 World Environment Day anogo nungi küm ka tashi office tangatetba aser tazüokba nung 'Single Use Plastic' tem office campus aser office inyakyimtem nung mamshi aru aser iba tongpang koktetba ajanga tanü LKM office ya 'Plastic Free Campus' sangdonger ta LKM tir Sp. Imlinok aser tongti zülur Sp. Meyitongpang nati osang agüja liasü.

Tanü alima ajak nung iba anogo "WORLD ENVIRONMENT DAY" amungdang Langpangkong Kaketshir Mungdang ajanga yimyim tulu ayima Office campus telongtet ajak "Plastic Free Campus" asütsü ta telemtetba tajung agiba asoshi lenisür ajak dang kanga pelar aser tenüngsang agütsür, ta Ao Kaketshir Mungdang (AKM) ajanga lemsatep.

Iba ama mangdang akaba aser nükla tajung nung telemtetba agiba ya asen Aor atema dang masü saka Naga nung ajak atema mera tasen nung anir asütsü, ta maneni AKM ajanga shisem.

Angoshia alima tatsükba küma aodang shisaluyimer aser Aor senso tajung ajaki nükla

mangdang yur asen teinyaktsü kechi lir ibaji angatetta shilem tajung agitsü ayongzüker. Plastic pollution ajanga asen lima memeneptsü ta mali. Küm ishika tsüngta iba timtem ajanga asen Ao lima ajak tangshitsü. Anungji, iba anogo nungi tenzüka Plastic waste management/segregation ya ajaki angazüka ayutsü kanga tontipang ta angatetti. LKM ajanga koba mapa tajung tanü tenzüker, iba ama Aoli lokti tentet ajaki tenzüka inyaksüla, ta AKM tir Sp. Lanutoshi Aier-i sentong nung ayongzük.

LKM kübok aliba yimtsüng kaketshir telongjem (Unit) balala ajanga jelia aser iba anogo nung tzü-mopung kümzüksü mapa inyaka aser osang nüburtem den lemsatepba liasü. LKM office ajangasa iba anogo nung Tzükong nung aliba tulutiba Tzüla, Milak aser Longpong ayong (rivers) nung nübur ajaki sapuba tongtipang tesem shimteta merüktsü aser tatishitsü O tajung zülur Sign Board den janah ayong nung meindoktsü mechi merang agi yangluba Dustbin tesem balala nung yuja liasü.

Maneni Tzüla, Milak aser Longpong ayong Langpangkong aser Naga lima asoshi kanga senti ayong ta angateta LKM office ajanga nübur-i sapua kazüba tesemtem nung janah (Garbage) shitena item tesem merüktsü. Tesüiba mapang talangka asenoki ayongya janah entoktsü tesem tajungtiba ta bilem saka alima tasenka lir aser aji tebourtajung ayongtem aser aji kümzüksüla ta angateta tanü asenoki ayong merüker, ta

LKM tir ajanga ashi.

Ango, ozü-sangnu aser ali tzü mopung mozümora nungi kümzüksü merangertem yimden, kaketshir, Department, NGOs, Entrepreneurs aser lokti balala nem LKM-i tenüngsang tulu agütsü aser iba ama mapa tajung anünga aliba lokti aser tesotet lenirtemi angazüka bentshia aotsü yimlar ta shisem.

Nüburtemi pei lima nung aliba ali tzü mopung nungi rongsen ajangzüktsüji LKM-i kanga ajungshir aser talisa zünger mapa mangu aliba lanurtem ajanga item maparen nung meranga inyaktsü ayonger saka nüchiba nisung ka-ka ama tangatetba nung tarutsü asoshi bilemja tzü mopung tamshiyim nung amshia meinyaktsüla, ta ashi.

LKM office ajangasa Langpangkong litsü nung koila, long, süng aser item amala maparen nung inyaker ajaki maneni tangatetba tajung nung alima tzü mopung asoshi aria bilema inyaktsü asoshi ayonzüker aser talisa administration aser concerned authority, department-i temulung tesüyiba dang nung taliba agüja nübur temden inyaksüla aser tenzüksüla, ta LKM mendenti ajanga ayongzüka liasü.

LKM tejangraba mapa tajung ngua 'ASHIPO Society' Chuchuyimlang, GRACE Society Changtongya aser alima tzü mopung kümzüksü meranger tangateter lanur yimtsüng balala nungi pei sasa arua iba sentong nung yaritep aser iba den külemi nübur aser lokti balala ajanga rongsen agi yaritepba asoshi LKM Office ajanga pelaba lemsatepa liasü.





New Delhi, June 05, 2024: Lok Sabha election nung Rae Bareilly constituency nungi takok angur Congress lenir Rahul Gandhi aser Amethi constituency nungi takok angur Kishori Lal Sharma nati takok anguba certificates sayudang tangokba noksa nung angur. Kasa noksa nung party lenir ana- Sonia Gandhi aser Priyanka Gandhi Vadra nata angur.

### Modi leniba nung June 8 nü sorkar tasenba tenangzükba agitsü

**New Delhi, Aami/June 05 (Agencies):** Bodhbarnü Ato kilonser Narendra Modi-i menden nungi anenba shidi linük Tir, Droupadi Murmu nem agütsüogo aser Tiria shidiji agizükogo, ta osang ka ajanga metetdaksü.

June 4 nü BJP-i aniba NDA-i menden 292 nung takok anguba sülen anogo ka lir Modi-i Tir ajurua pa menden nungi anenba shidi den külemi union cabinet anenba shidi agütsü.

Rashtrapati Bhavan osang ka ajanga ashiba agi, Tiri Modi aser union cabinet dang sorkar tasenba maküm tashi office

nung maneni alitsü asüngdanga liasü.

Ato kilonser Modi aser Union Cabinet minister temi menden nungi anenba shidi agütsüba sülen 17buba Lok Sabha tembanger. Tang aliba union council of ministers kümsük ya June 16 anogo nung ang tembangtsü.

Tawa agiba Lok Sabha election nung Ato kilonser Modi-i aniba BJP-i majority (272) metongtet saka parnoki menden 240 nguteta largest party lir.

BJP aser NDA teloktep nung aliba party temi sorkar akümtsü atema asüngdangtsü aser Modi-

i maneni Ato kilonser tenangzükba agitsü.

Osang angazükba agi, June 8 nü Modi-i Ato kilonser tenangzükba agitsü.

Tawa agiba Lok Sabha election nung BJP-i menden 370 nungbosa takok angutsü nükjidong nung toktep aser BJP-i aniba NDA-i menden 400 tema nung takok angutsü, ta jembia aruogo saka parnoki menden 292 nung dang takok angu.

Ano külen Congress-i aniba opposition INDIA teloktepi menden 230 dak tema nung takok nguogo.

### Naveen Patnaik-i Odisha Chief Minister menden nungi anener



June 05, 2024 nü Bhubaneswar nung Odisha Chief Minister, Naveen Patnaik-i state Angh Raghubar Das ajurua menden nungi anenba shidi agütsüba sülen tangokba noksa nung angur. Tawa state assembly elections nung Patnaik-i aniba party-i tamakok angu.

**Bhubaneswar, June 05 (Agencies):** Tawa Odisha assembly election aser Parliamentary elections nung tamakok anguba sülen Odisha chief minister aser BJD tongti lenir, Naveen Patnaik-i Chief Minister menden nungi anenba shidi agütsüogo.

Pa tesüiba küm 24 tashi Odisha Chief Minister inyakogo.

Bodhbarnü Bhubaneswar nung Patnaik-i Raj Bhavan nung Odisha Angh, Raghubar Das ajurua Chief Minister menden nungi anenba shidi agütsü.

1997 küm nungi tenzuka Odisha nung Biju Janata Dal sorkar liasü saka tawa election nung parnoki BJP

matsüngdang tamakok angu.

Assembly menden 147 aliba state nung Bharatiya Janata Party (BJP)-i menden 78 nung takok angu, BJD-i menden 51, Indian National Congress-i menden 14, CPI (M)-i menden ka aser Independent candidate aseme takok ngua liasü.

2024 Lok Sabha elections nunga Odisha nung BJP-i menden 20 tashi nung takok angu aser tanünga menden kaji Congress-i angu.

Naveen Patnaik-i BJD ajanga yimtenren nung mezüng ajemoka liasü. Iba party ya tebu aser taoba mapang Odisha Chief Minister Biju Patnaik nungtem nung ajaba party lir.

1998 küm Lok Sabha by

election nung Patnaik-i Aska menden nungi takok ngua liasü. 2000 küm assembly election nung BJD-i takok anguba sülen parnoki BJP den loktep aser Patnaik-i Chief Minister akümtsü atema Union cabinet tokja liasü.

Iba mapang nungjagi tenzuka Patnaik-i Chief Minister tang tashi inyaka aruogo. India nung Chief Minister mapang talangtiba inyaksangji taoba mapang Sikkim Chief Minister Pawan Kumar Chamling lir aser tanabuba jenjang nung Patnaik asütsü.

Patnaik-i mezüng 2000 küm March 5 nü Odisha chief minister tenangzükba agia liasü.

### Delhi nung INDIA teloktep senden amener

**New Delhi, June 05**

**(Agencies):** Bodhbarnü Congress Tir, Mallikarjun Kharge-i INDIA teloktep nung densema aliba party ajaki Lok Sabha election nung BJP anema longjemer toktepa atema party ajak dang pelaba lemsatep.

Bodhbarnü New Delhi nung Congress Tir, Kharge'er kidang INDIA teloktep nungi lenirtem senden tenzuka sorkar akümtsü takoktsü lenmang bushiba den külemi tarutsü atema asalentong yanglu tenzükogo, ta osang angazüker.

Iba senden nung okila jembidang Kharge-i, "Election osang ya Modi anema lir, pa anema aser pa indang yimtenren inyakim anema lir. Yimtenren tsütsülen nungi iba ya pa kija atema-a takoksa tulu. Ajisüaka pai nüburtem taginüba anema inyaktsü," ta metetdaksü.

Iba senden nungji Mallikarjun Kharge den Congress Parliamentary Party

chairperson Sonia Gandhi, Rahul Gandhi aser Priyanka Gandhi Vadra nung densema Congress lenirtem aika dendar.

Kasa senden nungjisa Tamil Nadu Chief Minister MK Stalin, DMK nungi T R Baalu, Jharkhand Chief Minister Champai Soren, JMM nungi Kalpana Soren, NCP-SP nungi Sharad Pawar aser Supriya Sule na aser Samajwadi Party (SP) nungi Akhilesh Yadav aser Ram Gopal Yadav nungera dendar.

Kasa senden nung Trinamool Congress nungi Abhishek Banerjee, RJD nungi Tejashwi Yadav, Shiv Sena-UBT nungi Sanjay Raut aser Arvind Sawant na, National Conference nungi Omar Abdullah, Sitaram Yechury (CPI-M), D Raja (CPI), AAP nungi Sanjay Singh aser Raghav Chadha na aser RSP nungi N K Premchandran nungera dendar.



June 05, 2024 nü New Delhi nung World Environment Day anogomong nung Ato kilonser, Narendra Modi-i Buddha Jayanti Park nung süngdong ka atemdang tangokba noksa nung angur.

### Chandrababu Naidu-i Speaker menden akhangtsü

**New Delhi, June 05**

**(Agencies):** Chandrababu Naidu-i aniba Telugu Desam Party (TDP)-i Bharatiya Janata Party (BJP)-i aniba National Democratic Alliance (NDA)

teloktep metoktsütsü aser NDA senden nung Chandrababu Naidu-i Speaker menden den külemi tanga takhangba balala agütsütsü, ta osang ka ajanga metetdaksü.

Congress-i aniba Opposition INDIA teloktep nungi lenir shingaia tang tashi nungbo teyari meshitsü atema Naidu den mejembi, ta osang angazüker.

Tang tashi nung INDIA teloktep aser NDA nung madenba YSRCP aser Independent candidate aika lir, anungji INDIA teloktepi sorkar akümtsü atema Nitish Kumar-i aniba Janata Dal United aser Naidu-i aniba Telugu Desam Party (TDP) na den Independent candidate teyari

agitsü atema jembishinüdar, ta osang angazüker.

Bihar Chief Minister, Nitish Kumar aser Naidu nati menden tulu khanga INDIA teloktep nung denra INDIA-i tanga party tila kar den independent candidates teyari agia sorkar akümtsü lenmang lir. Ajisüaka Kumar aser Naidu nati NDA metoktsütsü ama reprangteter.

Delhi nung NDA senden nung TDP aser JDU nati BJP pusemba shidi agütsütsü, iba sülen NDA-i Centre nung sorkar akümtsü atema asüngdangtsü, ta osang ka ajanga metetdaksü.

Andhra Pradesh nung TDP-i menden 16 angu, Jana Sena Party-i menden ana aser BJP-ibo menden asem nung dang takok angu.

Ano Bihar nung Janata Dal (United)-i menden 12 nung takok angu aser BJP-ia menden 12 angu.





## TIR YIMYIM YIMOBILEM (EDITORIAL)

DIMAPUR YANGTEPNÜ, JUNE (AAMI) 06, 2024

### Ali shia arudaktsüdi

United Nations leniba nung yashi alima ajunga nung Alima Lipukümmung , World Enviroment Day, mungogo. Taküm 2024 küm iba anogomung asoshi shimtetba omenji ali tajung agi lisem aser takong lima kuma aoba nungi shia arudaktsütsü indang liasü. Asenoki junga mebilemdanger dang ashi, asenok nisung shiai kanga temulung agüja inyaktsüba mapaji asen aliba li ya meraksai süngdonglidonga meyitsü, ali tema aser telonglena tzu maremtsü aser alua yimtettsüsa alitemo mesamadaktsüi anepalua kumzüka ayutsübaji asenok ali nunger taküm alitsü asoshi tongtibangtiba mapa lir. Asenoki aiben asenok ali nung alir ser nung tanü lirbo asüngbo ali nung yabo chirnurtema malitsü amai bilema ali tema aser telong ajak takong kümdakja inyaker. Iba jagi tanü alijak ya pongu sü nung kasübo lisem lima kuma odagi. Aji oda, asen lima tilaka nung ya dena alu meyimtettsüsa tesem aika ali takong kumogo. Item tesemtem nungji joko süngdonglidong memeyir, tzu mapoker aser moponga tatsükba-tatsükba kuma aoer, anungji nisung alia majung aser alu ayimtsüa majung ta alibo ali saka tagidak makaba li kümdaktsür. Aji oda, tanü asen yimer li tilaka nung alu meyimtettsüsa aser nisunga melitetsüsa lisem lima ama kuma aobaji odang toktsüra, iba nung jagi tenzüker taruba küm noklangka tsüngdangbo tanü asenok taküm alirtemibo majurutsüa akok saka asen chirnur aser semchirsemnurtembo, tanü Africa lima nung atalokba amaji, alijak nung süngdonga kata mali, ali takong aser mopong tatsük agi tali majung asütsü. Ibaji asenok nukla dangi arua asenoki tarutsü küm noklangka asoshi danga bilema yashi asenoki raksaba ali, alu aser arem shia arudaktsütsübaji tanü ya mapang tajung asütsü. Asenok aikati chirnurtem tarutsü mapang asoshi bilema longki amentepa yanglua toktsür. Ajia junger saka asenoki parnok alitsüba li junga anepalua meyutsüra asenoki tanü yanglua toktsüba kidangji tzu mopong majungba agi tali majung akümtsü. Iba tangatetba nung asenoki tarutsü küm aika asoshi bilema ki tajung yangluba amaji kasa tangatetba nung asenoki tarutsü küm aika asoshi bilema asenok meyong li, arem aser ayong kumzüka ayutsübaji kanga tongtibang kumogo. Alu ayimtsü asoshi arem machidoktsüla ta masü saka alu yimtettsüsa asen lima nung arem alitsüla. Aji oda, arem agidang ali temo soita ayur aser tzu agütsür , anungji ali temo aser tzu alidakji dang alu yimtettsü. Itemji mapa kuma atalokdaktsütsü atema teinyaktsü ana lir, kaji tang asen lima nung aliba aremtem akok tashi wazüka ayutsü aser alu ayimba nung akok tashi ali temo yirutsütsüsa mozü aser metsü mamshitsü. Ano tanabuba teinyaktsüji, tanü asen lima nung asenoki mekümdang aser mebilemdangba ajanga ali kobasa takong kümdaktsür ali, itemji shia arudaktsütsü. Taküm, Alima lipuküm Anogomung ajanga ajungshiba teinyaktsü mapajibo aji lir. Asenoki aiben Lipuküm mung amung dang süngdong meyia aliba tesemtem nung dang süngdonglidong atemer, saka süngdonglidong memeyitetsüsa ali takong kümer aliba tesemtem shia arudaktsütsübo tebilema mebilemer. Aji oda, taküm Alima Lipuküm Anogomung omen ajanga asenok nema tangatetba tasen ka agütsüogo aser teinyaktsü wadanga tasen ka teyüogo ta bilemdi. Atangji, Alima Lipuküm Anogomungbo yashi süiogo, ajsüaka asenok atema asen aliba li kumzüka anepalutsüba yabo alima lilukümmung nüji dang masü saka anogo shia asen aliba li kumzüka amungba anogo asütsüla. Asenoki ali ya asen ki amai bilemdi, kechiyong ali ya mali nungbo kong alitsü ? Aser ali aliyonga taküm tali majung aküm nungbo kechi sütsü ? Asenok ayaongayonga alitsüsa ali anepalua kumzüka ayutsüba ya mapa kanga tongtibang saka teinyaktsü asoshi tasakbo masü, ajaki ajaklen anogo shia inyaktetba mapa ka lir. Aji oda, tangatetba tasen nung tang nungibo asenoki süngdong meyitsü mekoki kümer aliba ali takong kar repranga, yangji süngdonglidong tema aliji shitak shia arudaktsü tenzükti.

## OLEMSABANG

### Aor ozü tamapur aser ozü tuluba ta otsü zülutepba ya anentsüla

~ L. Kika Pongener.

Aor ozü tamapur aser ozü tuluba ta raktepa ken o bulutepba aser ashishitepba aser otsü-olem zülutepba ya anentsüla. Kin-kidong jakzüka aruba lipoklisang otsü tali bushitepa, kidong shia pei jurila otsü kaket zülutsü tenzüker külen nungi, kidong o kidong tsüngda nung temeim mekongga akümer aser telongjem raksar. Aji oda, kin-kidong jakzüka aruba otsü tarensen meteta alitsü kanga tongtipang, aser tarutsü lanur putu atema kaket kuma zülua yutsütsü kanga tongtipang. Ajisuaka, tim dak alaka, katia katia pei tuluba shisanga zülutepdang, kidong o kidong tsüngda meputep tali atener. Ao kin dak aketba tashimait kaji, pei kidong otsü sura ajak tajung, saka tangar otsübo tamajung dang, ta pei ajunglen asa-a züludang, asen otsüji asen atema dang ashi, tangar atemabo tamakila otsü akümer. Otsü kaket ka zülutsübaji kanga temelabo masü, nübur, shisatsü, mapang aser rongsen jenti endoker. Yamaji timtem aika agia kaket kuma zülur asen atema dang ashi, tangar atemabo tajangzük masütsüsa zülutetbaji kanga-sa takoksa tulu asütsü. Tesasatsüka, tanü kidong otsü züluba kaket karbo kipok nung miimshia dang ayutsüla, tangar dangpo mesayutsüla, ano kaket karbo yimden bangdak kari shibanga yutsüba, mesura ken o ashishitepba, ano karbo obendangdak sabang (Court) nungang ken o akatsüsa zülutetba ngua kanga-sa sasar. Anungji kaket kaji kecha tashishi meli-i ajaki sapua azungtsüsa zülura, lanur putu asoshi senti rongsen asütsü.

Otsüla-oboula nunger dak aketba sobaliba tajung aser parnok libaliroa aruba nungi angazükbaji...Oboula Tongpok dak jakzükertemi, oboula Longpok aser Longjakrep dak jakzükertem dang anukla-okola nunger ta...Aser ano oboula Longpok aser Longjakrep semchirtem-ia yamaji oboula Tongpok dak jakzürtem dang anukla-okola nunger...ta akümtsübutepa, meimtepa, züngshitepa, ketasentepa lia aru. Alima nung alir asünung, teti dangpo pelatepa malitsü, mapang kar nungpo, kenbang-obang mapu ken o-a adoker, saka iba ama mapang nungji tantsü-tambutemi lanurtem dang, shinga-ia ken o tali-tapong tejembima no...tali-tapong kecha teinyakma no...aji tangar masü anukla-okola nunger ako...Asenok 'Tsükden o Sazü' na amai sentaktepa oa lir-ko...Nenoki kanga junga meshisadangi tanü ajung asa-a jembira aser inyakra...Ner lanur putu tashi kibalembutsüba nung tarak akettsü aser tejak kirakteptsü ta sayubentsütepa lia aru. Otsüla-oboula nungeri tanü ajung asa-a ken o-a mejembi aser tashiyim agi mapa-a kecha meinyak. Saka kanga tesasatsüka, tanü asen putu nung kin-kidong otsü zülutepdang kidong kati tangar kidong indang tenung menukja zülusatsür, aser ibajagi tsükchitep tali atener. Asen Aor asen o asen na tsüngda kati ka ajungba majinutepba ya memelenshira kodanga tangar memeneptsü.

Tanü asen Aotsür Aor adianu-aianu tsüngda telongjem raksatsüba küli kaji, kidong shia pei jakzüka aruba tebou taren otsü-olem tali aroka bushitepba ya asütsü. Aji oda, pei kin/kidong jakzüka aruba tarensen otsü-olem metetsübaji kanga tongtipang, saka tim dak alaka, pei ajunga asaa, tambu aser tuluba shisangtepa zülutepba yagi tajung melena mepetmesu-ang tali adoker. Ao kin koba mapang nungi kidong shia jakzüka aruba otsüren bushitepa zülutsü tenzüki, iba mapang nungi kidong o kidong tsüngda nung tambu, tanübu, tuluba, tilaba, tamapur, tesupur...ta ashishitepa ken o bulutepba ya tali aküm aser sorkar obendangdak sabang (Court) tashi ken o bener aotsüsa aküm. Aji oda, kechi kidong sudir suaka, pei kidong otsü zülura, indang-indanga pei kidong indang otsü zülutsüla, saka pei kidong ajungba tali shisang-nudang, asen den sendaktepa aliba tangar kidong karbo tenung tamajung jalokja zülutepba, aser kati ka nemja-luja zülutepba yagi meputepba ya tali atener. Anungji kechi kidongi otsü züludir, tangar dak mekongshi-i, indang-indanga pei kidong otsü dang zülutsüla.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



# May ita nunga India nung Khristantem anema inyakba aika liasü



Chhattisgarh state kübok Bastar region ka nung lokti kati Tenla ki ka amakdang tangokba noksa nung angur.

**June 05, 2024:** Taoba ita nunga India tesem balala nung Khristantem anema inyakba, tekülem sentong tagidak mapang timtem agütsüba aser Khristantem asüpila sentong nung timtem agütsüba tatalokba aika liasü, ta osang ka ajanga metetdaksü.

May 5, 2024 nü Uttar Pradesh kübok Deoria district nung Kushmita leniba nung tekülem sentong agiba mapang Hindu nung telok kati amak. Tesülen police arua Kushmita den nisung ana apu aser parnok chioktsü atema police-i sen 20,000 meshia liasü.

Kasa anogo nungjisa Uttar Pradesh kübok Kaushambi district nung Pastor Ranji Lal leniba nung sarasadem sentong agiba mapang lokti kati timtem agütsüba sülen police-i pastor puer ao.

Chhattisgarh state nunga Bastar district kübok Nainanar nung Khristan, Motiram Kashyap tebou asüpila sentong nung adentsü atema aodang Motiram den par medemer Khristantem dak azük.

May 4, 2024 anogo nung Kapanar yimdak arrshi küm 25

Kosa Kawasi-i Khristan yimsü toktsütsü memelungba agi par kinüngertemi pa po agi koseta liasü.

May 13, 2024 nü Chhattisgarh kübok Narayanpur district nung Khristan, Ranjit Salaam tasü mang yimdak meremdaksütsü ta nokdanga liasü, ibayongji kinüngertemi tasü mangji yimdak arrstülen aonung piyong ayu, aser tasü ngnep ang maongka ngua tasü mangji arem.

Osangbener den jembidang Evangelical Fellowship of India (EFI) kübok Religious Liberty Commission-i, "Chhattisgarh state kübok Bastar region nung Khristan asürtem nem akhüm magütsür aser tasü mang aremba nokdang. Iba timtem ajanga Khristantemi pei kinünger asüba atema mangyim sentong-a junga magiteter," ta metetdaksü.

Parnokisa, "Tribal nisungtemi akhidang nungi pei li nung mesüra yimdak leper nung tasü mang rema aru, ajisüaka right-wing organization temi tribal tentetem aser Panchayats tashi nung amoushiba ajanga tribal

Khristantemi tangbo timtem aika ajangshir. Khristantem tasü mang aremstü memelar, yimdak nungi meindoker, Khristantem meyong ali rakzüker aser mapa maongka magütsür; item kuli balala ajanga item district nung tribal Khristantem kanga timtemer saka ketdangsertemi taochi mesayur," ta metetdaksü.

May 12, 2024 nü Haryana kübok Bahadurgarh nunga Pastor Joel leniba nung Khristantem sarasadem sentong tagidak mapang nung lokti kati timtem agütsü aser Khristantem kar pua ayuba sülen tesülen ang chioka liasü.

May 26 nü Maharajganj nung sarasadem sentong ka nung Khristan ka apuba sülen bail nung chiok aser Rajasthan kübok Karauli district nunga police-i pastor Rohit apu.

Kasa anogo nungjisa Chhattisgarh nung Dhamtari district kübok Bhakhara jila nung right-wing züngsemtemi Tenla ki asem raksastü.

# China nung Khristantem reshikangshi Hong Kong tashi proker: RI

**June 05, 2024:** Tiananmen Square nung nisung jenti tepsetba sülen küm 35 ajungba anogomong nung Release International-i, China nung Khristantem reshikangshiba ya Hong Kong tashi proker, ta metetdaksü.

1989 küm June 4 nü China yimtiba, Beijing nung aliba Tiananmen Square nung longkak aiterem jenti tepsetba ajanga dang democracy pusema longkak aitba anena liasü aser iba mapang nungjagi tenzüka Khristantem reshikangshi jenjang tamajungba aküm.

Hombarnü Release International-i, iba tatalokba sülen küm 35 ajungba mapang nung China nung Khristantem tang tamajungba reshikangshir, aser iba ya

tangbo Hong Kong tashi proker, ta metetdaksü.

Hong Kong nung national security ozü ng tasen benokba sülen item ozü ng kübok pei tebilemba sadema jembiba temeden magütsür aser yimsü temeden magütsür.

Alima tesem ajaklen reshikangshi ajangshiba Khristantem yarir melungtet telok- Release International-i, ozü ng tasenbaji ajanga Hong Kong nung Khristan putirtem dang züngsemtemi nangzükbaba temenen sangdongang ta tuyutsüa akok, ta metetdaksü.

March ita nung agizükba Arrla 23 kübok tamangertemi linük anema inyakba mapatem putirtem dang nangzükbaji putirtemi communist sorkar den melemsara putirtemji ita 14 tashi tepuokdak ayutsüa akok,

ta Release International-i metetdaksü.

Release International nung partner, Bob Fu-i, Khristan putirtemi tamangertemi nangzükbaji lemsatepra tamangertemi putirtem dak tamang mekatettsü aser China nung Khristantem reshikangshi ano tamajungba dang akümstü, ta metetdaksü.

China nung tamangba yimsü temeden atema Bob Fu-i küm aika inyaka aruogo. Pai, Khristantem aikati Hong Kong toktsür oadokogo, aser parnok teimbakati United Kingdom nung jenoker, ta metetdaksü.

Tawa U.S. Commission on International Religious Freedom report ajanga, China-i Hong Kong nung Khristantem aser tamangertem azüoktsü meranger, ta metetdakja liasü.

# ANOGO ABEN TSÜNGREM DEN

## Medemertem Shimtetang

T.Ken 119:57-64

Medemertem akaba nung ajaki pelar. Asenoki parnokji nungdaker. Ken züluri Tsü ngrem O ji pa medemer ta ashi. "Shirnoki ne akhüm tsübur aser shirnoki ne ozü ngtem benshir, parnok ajak medemerji ni lir" (t.63). Tsü ngrem O i ashiba ama, pai pa medemertem shim. Asenok temetetteper aika lir saka medemerbo ishika dang lir. Mapang ajak nungbo nai mejembiba medemer kar lir. O mejembi mapang talangka külemi alitsü akok, aji saka temulungjangbo lungjema lir. Medemer kar denbo nai metsü bui jembitetba medemertem lir. Nai ne mulungjang nung khuret magütsütsü akok, aser na pa den aliba agi nü busen tajungba asür.

Tsü ngrem asenok tembar tajungtiba lir. Abraham dang Tsü ngrem tembar ta aja, asenoka Pa tembar asütsü akok. Yisui nütsü ngtem dang ashi, "Ni nenok dang kilir ta majar. Ni nenok dang tembartem ta ajar" (Yn. 15:15). Tembartemi kati ka den jembiteper. Aser asenoki Tsü ngrem den jembira aser Pa O ajanga Pai asenok den jembidaktsüra, Pa tsübur aser Pa ozü ng ayurtem medemer asenok asütsü.

Tembarsüba tongtipang tetentangba kaji Tsü ngrem O tsütsü kü tembar mulungsentsü kechi aji lir. Pai ibaji agizüker asü? Pai Tsü ngrem O ji ochi ta agizüker asü? Pai Tsü ngrem tsübur aser meimer asü?

Tsü ngrem O ajanga ni Tsü ngrem den tesendaktep shidak lira, ni nübur den tesendaktep shidak nung lir. Kü tembartem Tsü ngrem tembartem alitsü. Laishiba iba dang pilaa aliba ta ajar. Laishiba O nung alibaji temoatsü taküm ka lir.

Ne medemer kümdanga shimang. Parnoki Tsü ngrem tsübur asü masü? Laishiba angatetta alibaji tembar tajung ta zü ngshiang. Tesendaktepji asenok mapang rizü ngba lir. Parnokji teti tatem maka asoshi ta zü ngshiang.

# Plateau State nung Fulani teloki pastor ka densema Khristan 5 tepset

**June 05, 2024:** Nigeria nung Irigwe Khristantem aser Fulani Muslim lenirtem senden mena tesendaktep tajung alitsü atema bangjema sülen hopta ka tsü ngda Fulani teloki pastor ka den pa kinü ngtsü densema Khristan pongu tepsetogo, ta International Christian Concern (ICC)-i metetdaksü.

Prangpong amer Islamic Fulani teloki June 2 (Amongnü) nikongdang Plateau State nung Kwall district kübok Khristan yim Kimapka amak.

Irigwe Development Association (IDA)-i sangdong ka ajanga, Fulani teloki amakdang asürtemji Assemblies of God Church, Kwall nung pastor arrshi küm 63, Dauda Dalyop, pa kinü ngtsü Chummy Dauda (57), Chwe Ajuhs (26), Joshua Kusa (45) aser Rikwe Doro (43) nung liasü, ta metetdaksü. Kasa tatalokba nungji arrshi küm 36, Sunday Abila-a yiru.

JoS nung Nigeria Army of Operations Save Heaven Peace (OPSH)-i ayongzükbaba Peace

Implementation Committee senden nungji Plateau state nung Irigwe Khristantem aser Fulani Muslim nungertem tsü ngda yimjung nung alitsü atema bangjema liasü.

International Christian Concern (ICC) staff ka den jembidang Khristan lenir kati, "Fulani lenirtemi kiralongrartem den jembiba ajanga yimjung alitsü, ta onoki amanga liasü, ajisüaka Fulani telungpurtemi pastor aser kinü ngtsü na den Arogo nung zü ngsem asem tepset," ta metetdaksü.

Miango district nung Evangelical Church Winning All lenir, Rev. Akus Odoh-i, "Nigeria nung sobaliba tajung ajak samaogo aser West Africa nung army tem akhümket makai kümogo. Iba sorkar yagi meimchir temeden akhüm-metsübur," ta metetdaksü.

Rev. Odoh-isa iba tatalokba jungjunga bushisü ngdangtsü takhangba agütsüba den külemi takhangba agütsüba den külemi Peace Implementation Committee-a aitsü.



AO OSHI ANGAZÜKDAK: TANÜ ANGAZÜKTSÜBA OJANG



Süsang

(n) koya mesükba arem shiruru (squirrel)

\* Süsang ya süngdong tulu nung alir.

Süsep

(n) sü mesükba takümsangnu tapu ka (beetle)

\* Süsep ya tashitait takümsangnu ka lir.

OLONG PAITEP # 6810

Grid for OLONG PAITEP # 6810 with numbers 1-17 in various cells.

TIPIEN

- 1. Nüji masü - (4)
3. Techinütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6809 TELANGZÜBA

TIPIEN :

- 1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

- 1. Temesen, 2. Raksa, 3. Aon,
4. Aso, 6. Nile, 9. Alizüng,
10. Omen, 11. Lemta, 13. Ola,
14. Kin.

NAI-A YA METETTER MA



Arishi küm 11 tain Mizo nunger Samuel Lalbiakhlua-i alima nung paragliding pilot tanubosang tenüng ngutetogo. Samuel-i Bir Billing Himachal Pradesh nung March 16, 2024 nü iba otsü yanglutet aser International Book of Records-i tawa tu iba otsü tasen agizükba metetdaksüogo.

WED nung yimdaklirtemi sand gravel mining anema lungkak ait



Guwahati, June 5, 2024

(Agencies): Assam kübok Boko ayong anasa alir Gohalkona, Lapgaon aser Kompaduli yimtsüngtem nungi nisung noklang aika adenshir state forest department-i sand gravel mining asüba anema lungkak aitogo.

Iba sentong ya Border Area Development Youth Organisation ajanga ayongzük aser World Environment Day den külemi agi. Parnokisa teraksa ajuruba tesemtem nung süngdongtem tema ao.

Gohalkona, Jongakhuli, Komaduli, Lepgaon aser Katholpara nungertemi Uday Sarania araksetba tesem nung adenshi. Lepgaon nunger Uday ya May 17 nü Boko ayong nung arakset aser tanü lungkak aitertemi pa nem tetushi agüja narotem yutsü.

State sorkari sand gravel mining asüba ajanga iba lendong atalok ta lungkak aitertemi aitsür.

"Onoki SDC, Ranger, DC, DFO, Forest Minister aser tanga ketdangsürtem dang sand gravel

mining anentsü atema shidi züluba agi lakogo. January 25, 2023 nungi sand gravel mining tenzükba ajanga ayong kanga raksatsüogo aser menentsüogo" ta Border Area Development Youth Organisation president Jonson Sangma-i ashi.

Osangbenertemi Singra Forest Range Officer Bhargabh Hazarika den asüngdangtep dang pai iba ken o bushisüngdangtsü aser yimdaklirtemi benokba khurettem reprangshimtsü nangzük.

Assam nung election results sülen ajungbena totzü jenjang atu

Guwahati, June 5, 2024

(Agencies): Lok Sabha election results sangdongba sülen ghonda 24 majungdang Assam nung aser talisa Guwahati nung alirtem kanga aoksatepogo aser ibaji petrol aser diesel jenjang atuba lir.

Linük nung election results osang prokshiba mapang ka nung kanga dang ajungbena

totzü jenjang atuba atema nübortemi tebilemtsü abener. Sorkari petrol litre nung Rs 1.02 aser diesel litre nung Rs 1.01 tuogo.

Tanü Guwahati nung petrol litre nung Rs 97.19 aser tesüiba anogo 10 tsüngda litre nung Rs 96.13 aser Rs 97.19 tsüngda yoka arur.

Maneni, diesel litre Rs 89.42

kümogo aser etsüiba anogo 10 tsüngda Guwahati nung Rs 88.38 aser Rs 89.42 tsüngda ayoker.

Sorkari kanga dang ajungbena totzü jenjang atuba atema public-i jashiba metetdaksüoogo. Kanga dang ajungbena jenjang atuba ajanga kija aser shishilembartem timtemer aser sorkar dang nungi kuli meshir.

June 9 nü SKK sorkari Paljor Stadium nung tezüngzüktep agitsü

Gangtok, June 5, 2024

(Agencies): Sikkim nung Prem Singh Tamang 2.0 sorkar June 9 nü Paljor Stadium nung tezüngzüktep agitsü.

Iba sentong tulu agitsüba ya party züngsemtem aser public-i aginüba nung ajemdaker lemtet.

"June 9 nü Paljor Stadium nung tezüngzüktep agiba sentong agitsü. Party züngsemtem aser public-i iba sentong Paljor nung aginüba liasü

kechiyong 2019 nunga kasa tesem nung onoki sentong ayongzüka agi" ta Prem Singh Tamang-i ashi.

"Mezüngbuba nung ni PM Modi, Amit Shah aser BJP züngsem ajak nem tenüngsang tulu agütsür. Ni NDA nem tenüngsang agütsür kechiyong linük ajungai NDA nem sorkar kümdaktsünür" ta pai ashi.

NDA-i sorkar akümstsü. Tezüngzüktep agiba sentong nung ni Northeast Chief

Minister ajak jaoktsü aser parnok mapang adokra arua adentsü, ta Prem Singh Tamang-isa ashi.

Taküm Sikkim assembly election nung SKM-i takok tulu nguteta liasü. Züngsem 32 agi akümbsa assembly nung SKM-i menden 31 nung takok angu.

Külen, opposition Sikkim Democratic Front (SDF)-i menden ka nung dang takok angu.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA

DT. KOHIMA, THE TH JUNE, '2024.

NOTIFICATION

NO.DTE/ESTT-2/NEET/01/2024-25/ This is to notify the NEET (UG)-2024 appeared candidates intending to avail Nagaland State Reserved seats for MBBS,BDS, BVSC&AH, BAMS, BHMS & BASLP that registration forms are available at the Directorate of Technical Education, Kohima (Below New Secretariat Complex) on payment of Rs. 500/- only w.e.f. 6th June, 2024 during office working hours. The form may also be downloaded from the official website of the Department https://dte.nagaland.gov.in in which case the fee should be submitted in cash along with the form printed in white paper (A4 size) by hand.

The last date of submission of filled form along with NEET score card and all necessary documents to this office on or before 15thJune, 2024 after which no applications will be entertained.

Note: Candidates are informed to read all necessary instructions given in the application form carefully before the form is submitted.

(ER. VIPULHOU LHOUNGU) Director.



# US House-i ICC nem temerenshi agütsütsü meranger

**Washington, Aami/June 05 (Agencies):** Gaza nung raradang mapa tamajung inyakba (war crimes) atema Israel ketdangsürtem anema ken o benoka merenshitsü merangba mechi International Criminal Court (ICC) nem temerenshi agütsütsü nükjidong nung United States ozüing yanglur temi legislation ka agizükogo.

Mongulbarnü Illegitimate Court Counteraction Act bhukuma Republican-i amokbanga aliba House of Representatives nung vote 247-155 agüja liasü. Iba bill yagi Israel Ato Kilonser Benjamin Netanyahu aser Defense Minister Yoav Gallant aputsü atema warrant agütsüba nung shilem agiba ICC ketdangsürtem US-i aittsü memelatsü aser aser US nung senotsü transaction nung nokdangtsü.

Iba vote ya yimya ka dang ama repranger, saka iba yagi US nung party tuluba indang ozüing yanglur timbai Israel bhukumba ajiteter.

Item tenokdangba ya mapa kuma meinyakdang maparen aser yimya balala nung mera agitsü lir.

Netanyahu aser Gallant nungner aputsü asoshi jembiba atema US Tir Joe Biden-i khuret lemsatepa liasü, saka ICC anema sanctions agütsütsü ya khenyongi magizüker aser parnoki tera tali aor ta ashi.

Iba temzüing ya Senate nung magizütsü amai ajiteter,

kong Democrats tem tera agi timba lir. Ajidang masü White House nungia magizütsü amai lir, kechiaser Biden-i memulngra veto asütsü.

Raradang mapa tamajung inyakba aser meimchir anema mapa tamajung inyakba atema Netanyahu, Gallant aser Hamas lenir asem - Yahya Sinwar, Ismail Haniyeh aser Mohammed Deif - yagi khuret abentsüla ta shitettsüsa kuli tejangja lir, ta taoba ita ICC prosecutor Karim Khan-i shia liasü.

Netanyahu-i ICC prosecutor indang telemtetba ya menüingdaker ibai Israel nungner ajunga dak tenük yokba lir ta shia liasü. ICC nung Israel ya züingsem masü aser US ya züingsem masü, kong züingsem linük 124 yagi par judges ajanga agütsüba warrants ya mapa kuma inyaktsü asü masüar telemtetba agitsü.

Gaza nung ita ti raraba mechi linük balalai aitsüba mapang US nung iba mera agiba ya ozüing akumtsübo meimlar, saka House nung Republican timba aser Democrats kari kari agizükba ajanga parnoki tanen makai Israel bhukumba sayur.

"US ya Israel den ajang-ajanga nokdaka lir aser tiazü nung tai tonglokja Israel lenirtem aputsü asoshi international bureaucrats temi melaba memulngra," ta Republican House Speaker Mike Johnson-i sangdong ka nung ashi.

Mongulbarnü iba vote agitsü

lia State Department odongtar Matthew Miller-i osangbener den jembidang, "Administration ka ama ICC anema tenokdangba agütsütsü onoki memulngra. Tang ya mapang shidak masü," ta shia liasü.

Hopta trok ceasefire ka nungi tenzüka teti asoshi yimjung tsütsü roadmap tasen ka Israel nem agütsür, ta Biden-i Hokulbarnü sangdonga liasü.

Ajisüaka Netanyahu-i par nükjidong ajak nung takok mangu tashi maneni raratsü ta nenshia ashi.

October 7 nü nungi tenzüka Israel-i Gaza amakdang nisung 36,586 tepsetogo aser 83,074 yirua lir, ta Gaza nung aliba Health Ministry ajanga ashir.

Tesüiba ghonda 24 tsüingta nisung 36 tepset aser 115 yiru ta ministry ajanga ashi.

Israel-i nisung jenti aliba Bureij aser Maghazi refugee camp tem aser Deir el-Balah anüdoklen tesemtem nung maneni amaker. Ghonda 24 tsüingta central Gaza nung Palestine nungner 66 tepsetogo, ta osangbener kati ashir.

Israel Ato Kilonser Benjamin Netanyahu-i Israel north tsütsü Lebanon den arütsüa aliba tesemtem nung security tour ka aoba tembangogo aser mera tesashi agitsü renema lir ta ashi.

Occupied West Bank nung aliba Hebron nungi northwest tsütsü mile 6.8 (kilometre 11) pilar Beit Ummar jila nung Israel sepaitemi nisung 35 apu, ta Palestinian news agency Wafa ajanga ashi.

# Ukraine nung France nungner military trainer tem dak tenük yoktsü: Lavrov



**Moscow, Aami/June 5 (Agencies):** Ukraine-i yokba France nungner military instructor tem ya Russia nungner sepaia asoshi "legitimate target" ka asütsü, ta Russia Foreign Affairs Sergey Lavrov-i ashi.

Ukraine nungner ketdangsürtemi, parnok sepaitem atema training asoshi France dang teyari meshidar ta ashiba sülen Lavrov-i iba olen lemsatepa liasü.

Mongulbarnü Republic of the Congo indang Minister of Foreign Affairs Jean Claude Gakosso den külemi osangbenertem den sensaksemba mapang Lavrov-

i iba olen lemsatepa liasü.

"France nungner instructors tem dak sendakba nung parnok Ukraine nung alitsü ta bilemer. Military ketdangsür süang mesüra mercenaries tem süang parnok ya onok sepaitem atema target ka asütsü," ta Lavrov-i ashi.

Ukraine nungner commander kati taoba hopta ashiba agi, pai paperwork nung sign süogo aser France nungner military trainer tem yakta Ukraine indang training center temi arutsü.

Iba sülen France tir Emmanuel Macron-i ashiba agi, pai olulu osang mesüra telemtetba agitsü aliba dak

sendakba nung kecha telangzüba magütsütsü, aser pai iba hopta tatemlen France jenjang metetdaksütsü.

Macron indang office sangdong ka ajanga Mongolbarnü ashiba agi, parnoki Lavrov-i jembiba dak sendakba nung kecha telangzüba magütsütsü. Ukraine nung France nungner instructors tem oa aliba indang kecha kuli mali.

Ukraine amakba dak sendakba nung Russia-i parnok pusemdaksütsü atema merangba mapang taoba küm ishika tsüingda Lavrov-i Africa aiben semdangogo. Tawa Africa nungner linüktem aikati France aser United States nungner aliba anüolen aliba linüktem dak temulung masüba lemsatepogo aser karibo Islamic insurgencies den raratsü atema Russia dang teyari mesidar.

Lavrov-isa, iba ita tatemlen Switzerland nung Ukraine peace conference agitsü aliba aitsüogo.

"Switzerland nung agitsü aliba conference ya kecha tetezü maket. Iba conference ajanga anti-Russian bloc kümzüka ayutsü atema dang inyaktettsü, koba tajir dang lir," ta Lavrov-i ashi.

## Office of the Jamijang (Mongsanger Semchir) Ungma Imlang Mokokchung, Nagaland SANGDONGER

Mr. Onentiba Jamir Tatar (Mongsanger Semchir), pa ya taoba Mopungsanger Putu atsüingti atsüingdang Ungma Imlang Kosasanger Putu nung Oboula Mongsanger dak jakzüka Jamijang nungi tulu tila ajaki temulung lemteta Tatar ka asütsü shimtsüba nübu ka, Putu atsünger rongnung atsüingti atsünger ka lir, aser tanü tashi yimsü süa arudang kecha nunga yimden senchi yimsür yimsüsür ka masü.

Pa dak kecha tarak maket tanü tashi lirepatsüka yimsü süa arudagi, anungji onok Jamijang (Mongsanger Semchir) ajak pa den lir aser pa ya nübur meimba yimsüsür ka ta alima dang sangdonger. Oboula Mongsanger Semchir Ungma Imlang 12th Aug. 2023 anogo lokti senden nung longjema alitsü lemtet aser tanaben-a 25th Sept. 2023 anogo kinunger lenla tabensa ajaki meyongnem agia akangshi taoba Tir Yimiyim adok 2nd Oct 2023 nung item osang angutsü. Ano tasemben 31st May, 2024 nunga akangshia Ungma Imlang Jamijang (Mongsanger Semchir) telongjem nung madener item nübur ya yimden yimil kecha nunga shilem mali aser kini memetet ta sangdonger.

Item tenüingtem:

1. Mr. Kikumsungba Jamir aser par sarutoker
2. Mr. Burkumzuk Jamir aser par sarudoker

Jamijang (Mongsanger Semchir tenüing nung

1. Mr. Rarentemjen Jamir Tatar

2. Mr. Takoyanger Jamir Tatar

3. Mr. Takanukshi Jamir Tatar

4. Mr. Nungsangmeren Jamir Tatar

5. Mr. Temsunungsang Jamir Tatar

## METONGSHITSÜR

5 Aami (June) 2024 Tir Yimiyim adok nung Tuli Town Council election atema agüja alibaji yamai melenshitsür.

ULB election nung Tuli Town nungi Women Reservation nung nokdaksüburtem yamai alitsü:

Wt. Shilutila Ait Lenden Ward aser Wt. Chubarenla Patizüing Ward nungi tetokteper mali (unopposed). Aser Tulikong Ward nungi Wt. Akumlemla aser Wt. Temsuinla tena tokteptsü.

Sd/-  
Information Secretary  
Watsü Mungdang

## METONGSHITSÜR

Tir Yimiyim Adok-233 Aami(June) 05,2024 nü Tapak 2 nung (Tuli Town Council nung tetsür candidate asem den tetokteper mali) ta asübaji candidate ana(2) den tetokteper mali ta melenshia züingdaksüner, ano maneni kasa osang tatemlen (Candidate-temji Aitlenden Ward nungi Shilutila, Patizüing Ward nungi Chubarenla aser Tulikong Ward nungi Temsuinla ta par asem lir aser tang tashi nung par asemprong tetokteper mali(unopposed) lir.) ta agüja aliba nungji Tulikong Ward nungi Temsuinla aser Akumlemla tokteptsü, anungji Aitlenden Ward aser Patizüing Ward ana nungji tang tashi nung tetokteper mali ta jangjashitsür. Aibelenba asoshi kanga dang sasasetta bilemer.

- Tir Yimiyim Osang Zülur.

## METETDAKTSÜR

Mrs. Imtilemla Ozükum D/o. Mr. Akangmar Ozükum. Imtilemla nem shirisa kinunger kuli makai sen apuja ali aji kinunger adianui memetet aser kuli masür tam metetdaksür.

Lar kinungertem -  
1. Akangmar (Ozk)  
2. Supongwapang (Ozk)

## SANGDONGER

Miss Sentibenla Jamir, Mr. Jongpongrepba'er semchir (Longpayimsen) ajanga shirnok dang nungi kechi sentsüh bener arudir aji kinunger aser anükapangi memetet aser tanü nungi onoki la indang khuret mabentsü ta alima dang sangdonger.

Sd/-  
Kinunger, Anukapang

## Lebanon: Beirut nung US embassy amaker ka apu

**Beirut, Aami/June 5 (Agencies):** Beirut nung United States embassy amaker ka puogo. Pa ya sepaitemi meyipier injang khaloktsüba mapang yirua liasü.

Bodhbar anepdang embassy ya Syria nungner kati maka liasü, ta Lebanese military-i metetdaksü. Israel-i Gaza maneni amakba ajanga iba Embassy amaksa, shiba sepaitem den khatapba mapang yirua liasü, pa puogo aser mozükidangi anirogo. Army-i X ajanga ashiba agi, iba nisungba ya Syria nungner liasü aser tang ken o bushisingdangdar. (Maneni tapak 8 nung...)



## Kohima nung Pre-Subroto Football asayamung tenzükogo

**Dimapur, Aami/June 5 (TYO):** Mezüngbuba Pre-Subroto Football asayamung lapokba sentong June 5 nü Indra Gandhi Stadium nung agiogo.

Asayamung lapokba sentong nung o jembiba mapang MLA & General Secretary Nagaland Football Association (NFA) Benei M. Lamthiu-i, Department of Youth Resources & Sports and Nagaland Football Association nati state level Pre-Subroto cum Junior Football Tournament

ayongzük jenjang tajung ka agiogo, ta ashi. Iba ajanga lanur asayartem nem sabang tajung ka agütsüsü aser parnok ajungmesotsü, ta paisa ashi.

Benei-isa, asayartem dang asaya ya hobby ka ama dang magitsü, saka tarutsü nung career ka ama agitsü ajungshia liasü. Pai, Department of Youth Resource aser Nagaland Football Association na longjemer lanur asayartem jangjatsü atema state Football League asayamung ka ayongzüksü, ta metetdaksü.

Maneni Benei-i state nung football asaya jenjang ajungketsü atema jenjang talila agiyonga aotsü, ta ashi.

Pre-Subroto cum Junior Football Tournament 2024 ya June 5 nü nungi June 12 nü tashi IG stadium, Kohima nung asayatsü. Taküm iba asayamung U-15 boys aser U-17 girls category nung district 13-i shilem agitsü. Iba asayamung nung state kübok district balala nungi asayar aser ketdangsür 468-i shilem agiba agütsü.

## Chennaiyin FC-i Brazil nunger defender Elsinho anisemogo



**Aami/June 5, 2024 (Agencies):** Chennaiyin FC-i Bodhbarnü Brazil nunger defender Elson Jose Dias Junior den küm ana atema tenanzüktepba yangluogo aser iba ajanga pa 2026 küm tashi club nungi asayatsü.

Chennaiyin FC puri iba hopta tetenzüklen midfielder Jitendra Singh alizükba sülen Elsinho ya 2024-25 season atema anisemba asayar tanabuba kümogo.

"Elsinho ya tashitait aser technical football asayar ka lir, shibai central midfield aser centre back ama asayateter. Pai back nung onok nem option agütsür aser iba den opposition box nunga pa ya lendong aketba asayar ka asütsü.

"Brazil nunger asayar ya onok indang bendanger asayartem rongnung ano tongtibang asayar ka asütsü," ta Chennaiyin head coach Owen

Coyle-i ashi.

Pa ya position aika nung asayatetba aser tenügdakba shilem agitetba asayar ka ta züngshir aser Elsinho-i defence aser midfield naprongla nung kanga junga asayatetba sayuogo aser iba ajanga club nem teyari tali agütsüsü.

Pa ya taoba season Jamshedpur FC nungi asayaogo aser parnok atema asaya 25 nung shilem agia liasü.

"Coach-i arua kü den jembai aser küm mapa dak sendakba nung tejangraba aliba sayua liasü. Tangar atsüa arutsüsa asayatetba atema ni kanga pela liasü aser tatem nung ni Chennaiyin-i arutsü atema telemtetba agiba nung iba ya tongtibang kuli ka liasü," ta Elsinho-i ashi.

Elsinho indang professional career ya 2014 küm Clube Esportivo Naviraiense nung tenzük. Pai pa indang career nung tang tashi nung asaya 214 asayar lir aser iba mapang goal 15 idaktsüba den assist ana sütsür lir.

Elsinho, pa indang career nung mapang talangbaka Mexican club FC Juarez nungi asayaogo. Pai iba club nungi 2017 nungi 2019 tsüngda asaya 136 nung asayaogo.

## Cummins San Francisco Unicorns nungi asayatsü



**Aami/June 5, 2024 (Agencies):** Australia nunger Test aser one-day international captain Pat Cummins-i, Major League Cricket club San Francisco Unicorns den tenanzüktepba ka yangluogo.

Arishi küm 31 tain asayar shiba tang Australia tenüng nungi United States aser West Indies na nung T20 World Cup asaydar, pai taruba season nungi tenzük 2027 küm tashi season pezü asayatsü atema

tenanzüktepba ka yangluogo. Pa iba club nung New Zealand nunger fast bowler Matt Henry aser Pakistan nunger Haris Rauf nunger den külemi asayatsü.

Cummins den külem Australia nunger Steve Smith, Travis Head aser Glenn Maxwell nungera Washington Freedom nungi asayatsü atema tenanzüktepba yangluogo. 2024 MLC season ya July 5 nü tenzüksü.

San Francisco Unicorns nungi asayatsü atema tenanzüktepba yangluba indang osang lemsatepba mapang Cummins-i, pa franchise kiburtemi atsüa aruba ajanga San Francisco nung denogo. Club kiburtem ya Silicon Valley entrepreneurs tem lir.

"Iba club nung adenba tiyongtsüji cricket asaya lir, ajisüaka mejeta club kibur aser Silicon Valley-i global network aser mapang talangka asoshi maongka agütsüba ya ni atema cricket asaya tembangba sülena maongka ka asütsü," ta Cummins-i ashi.

2027 MLC asayamung kong Cummins-i shilem agitsü atema tenanzüktepba yangluogo, iba asayamung ya England nung Ashes den mapang kasa nung asayatsü akok.

## Antonio Conte Napoli head coach kümogo



**Aami/June 5, 2024 (Agencies):** Antonio Conte Napoli coach asütsü shimba indang osang Bodhbarnü metetdaksüogo.

Napoli-i, Conte den küm asem atema tenanzüktepba yangluba sangdongogo aser Italy nung media sangdong balala ajanga ashiba agi, taoba mapang Italy coach yagi season ka nung euro million trok den bonus balala aatsü.

"Napoli ya international jenjang nung tongtibang club ka lir. Ni Napoli nung adenba atema kanga pelar," ta Conte-i ashi.

"Ni team aser club terenlok asoshi takokba tashi inyaksü ta tenanzükba agütsür. Ni taruba mapa atema bendanga agütsür lir aser yamaji kü staff tema bendanga agütsür lir," ta pai

ashi. Conte-i England nung khen aser Italy nung pezüben ta league kokogo. Pa 2023 küm March ita Tottenham toktsüba sülen küm ka dak tema club ka nung danga minyaki liasü.

Pai asaya ka tembangba sülen asayartem aser club kiburtem dak asaloktsür Tottenham tokja liasü. Conte-i taoba mapang nunga club kiburtem anema yimjak nung jembio.

Napoli puri küm semer dak tema lir 2023 küm mezüngbuba Serie A koka liasü. Luciano Spalletti lenisüba nung parnoki iba takok ngutetogo.

Ajisüaka Spalletti-i pa küm ka anisüngzüksü nüngdaker ta shia club toktsü, saka Roberto Mancini ajungbena Italy coach mapa toktsüba sülen pai iba

mapa belenzüka liasü. Iba sülen Napoli ya league puti otsü nung defending champions tamajungtiba team aküm.

Rudi Garcia, Walter Mazzarri aser Francesco Calzona nunger ajak melentepa Napoli caoch mapa aben, saka parnok tamajungba dang asayayonga ao aser season jenjang 10buba nung tembanga Europe nung asayamung ka atema danga qualify mesütet.

Conte tatemsa Italy nung Inter Milan nung inyaka liasü, koba pai 2021 küm Serie A title abenba sülen tokja liasü.

Kasa mapang nung Conte-i 2014 küm Juventus coach mapa tokja Italy coach mapa agizük aser pa lenisüba nung mimlai Italy team 2016 European Championship quarterfinals tonga asaya, saka tia maka Germany den penalty asayaba sülen tsük.

Iba asayamung masaya tsüngda ita ishika lia Conte-i pa club nung maneni inyaker ta ashi aser Italy coach mapa tokja Chelsea nung oa aden. Pa lenisüba nung mezüngbuba küm Chelsea puri Premier League akok saka küm ka dang lir pa mapa nungi anentsü.

## BENDANGLI OSANG : Tapak 7 nungi...

### Lebanon: Beirut nung US embassy...

Ken o dak sendakba nung Army-i osang tejangja magütsü, ajisüaka social media nung prokshiba noksa nung nisung ka Arabic oshi nung "Islamic State" aser English nung "I" aser "S" ta zülur aliba vest ka semer aliba nguogo. Iba nisungba ya azü agi yangbanger liasü.

Embassy kima nungi Al Jazeera osangbener Zeina Khodr-i ashiba agi, iba tesemi security aika yoka lir aser Lebanese army-i nüburtem iba tesemi aotsü memelar.

Yimti kübok Awkar tesem nung amenoka aliba embassy sangdong ka ajanga ashiba agi, anepdang 8:35 ako nung embassy kikümtong temeket nung injang khalokja liasü. Embassy-isa staff tem ajak kümzüka lir ta ashi.

Local media sangdong balala ajanga ashiba agi, telok ana tsüngda ghonda tesadangka khatepa liasü. Embassy indang security team züngsem ka yiruogo aser army-i iba tesem meita odar, ta security source kati Reuters news agency dang ashi.

Lebanese security sources-i ashiba agi, iba nisungba ya pa kija inyaksangshir masütsü akok, ta Khodr-i ashi. Ketdangsürtemi ashiba agi, embassy amakba nung nisung pezübosa densema alitsü.

Embassy ya Beirut anütoktoplen security kanga akanga aliba tesem ka nung amenoka lir aser iba tesemi aoba lenmang nung checkpoints aika amenoka lir. 1983 küm pei temang nung bomb alenoker pokdaksürtemi nisung 63 tepsetba sülen embassy ya iba tesemi belena liasü.

Otober ita Gaza nung rara tenzükba sülen Lebanon nung tensa mejungi lir. Iran den sendaktepa aliba Hezbollah telok-i Israel mapangshia maka arudar.

Taoba küma September ita nisung kati US embassy dak injang khalokja liasü, ajisüaka lendong nung nisung ka danga masü. Lebanon police-i ashiba agi, iba nisungba ya delivery driver ka liasü aser security personnel temi pa maksütsüba atema mang ayangtsü atema aruba liasü.

## BILEMDANGANG

"Nü akumli jenjang na asünü sayur."